

Aisciuda Ladina 2013: economia, teritorie e identità

La setemèna che vegn, e soraldut ai 10 e 11 de mé, vegn endrezà la 5^a edizion de la scomenzadiva che lea adum ogne setor de la sozietà fascèna

Ence chest an l'è ruà l temp de l'Aisciuda, chela del calandèr, ma ence chela del moment de reflescion di ladins sun sia identità e sie lengaz de mendranza. L travert del Comun general de Fascia te chesta manifestazion, ruèda oramai a sia quinta edizion, l'è chel de ge sporjer ai fascegn l met de pissèr a sie esser mendranza delaite da duc i moments che caraterisea noscia vita: la sozietà, l lurier, la cultura, l temp ledech, la storia del passà e chela che arà da vegnir per noscia val.

Identità ladina l'è esser e saer de esser jent rica de valores te na sozietà, chela fascèna, olache vèlch outa l ben economic somèa che l passe sorafora al besegn de duc nosetres de se tegnir da na man ence n cianton, olà poder coltivar n benstèr sozietà e uman fat de cultura, de èrt e de cognoscentia de sia reijes. Coscità l'Aisciuda ladina ge sporc vigni an ai fascegn n moment de reflescion, de festa e de bona prateghes, che les ge perferesc ai fascegn vides scempies e originèles da se tor dō ence tel lurier e ti momenc sozietà sia identità, les fajan doventèr valor

enjontà ence a livel economic. L'è pèrt de chesta scomenzadives l projet "Amisc del museo" sport dal Museo ladin de Fascia, la attivitàes del grop di joegn hotelieres de Fascia per ge dèr luster a l'identità ladina e ge la sporjer a sie ghesè, la scomenzadiva del Comun general per la publicazion che porta dant artejegn e boteghieres de Fascia, la terminologia del becè e del malghier da tachèr fora te la boteghes, l'identità te vedrina e i contac semper vives anter Scola ladina e teritorie e de altra scomenzadives che met al luster nesc esser ladins.

Program de l'Aisciuda Ladina

La quinta edizion de l'Aisciuda Ladina pea via tel teritorie con en lunesc ai 6 de mé, ma la aur ofizialmenter en vender ai 10 de mé te Museo Ladin.

Se taca ite da les 17.00 co la prejentazion del program de chesta edizion dal titol "Economia, teritorie e identità, n percors che va inant" e te chesta ocajion vegn portà dant ence la neves del Museo Ladin per duc si Amisc co "na rei per l'identità ladina".

Se podarà descorig i vèresc fac i egn passè e i resultac arjone trèr la desvaliva colaborazions de hotelieres, boteghieres e artejegn. Vegnarà moscià l prototip de la scafa dai libes per "Ladinhotel" fat dai bec del Liceum artistich de Poza, na regoeta de la terminologia del becè e del malghier da meter fora te la boteghes e prejentà l projet de la publicazion "Lurèr fascian. Artejegn e boteghieres de Fascia", n vademecum curt e zevil co la lingia de duc i boteghieres e i artejegn de Fascia. Na vida itola de envièr i fascegn a se emprevaler de la ressors professionèles de sia val. Tinùltima ge vegnarà sport n recognosciment ai produtores km 0 "Chi dal Formai" e duc i etres.



La Mèlga de Fascia con la neva sezion del Museo "L Malghier" l'è i protagonisè de chesta edizion dedichèda a la produzion del post.

Se serarà con n aperitif musical.

En sàbeda ai 11 de mé l'Aisciuda Ladina se tramudarà a Pera, alò da la Mèlga de Fascia, ajache te chesta ocajion vegn inaugurarà la neva senta de la Mèlga e la sezion del Museo Ladin "L Malghier".

Da les 10.30 vegnarà dit messa a l'averta, sobito dō sarà l tai de la veta e l'inaudazion de la Mèlga e de la neva sezion del Malghier endrezèda col didament de la Mèlga e l contribut de la Region Trentin Sudtirol e del Comun general de Fascia.

Da les 11.30 inant ujes averc te la neva sezion del Museo, da les 12.00 prejentazion e cercia del formai Dolomiti. Da les 13.00 marena col didament de la Mèlga de Fascia e de la Coprativa de Fascia.

Da les 15.15 meisa torona su: "Valor e valorisazion di prodoc dal post. Perferir la calità e stravardèr l'economia del teritorie". Tolarà pèrt Paolo Brunel president de la Mèlga de Fascia, Luca Giongo diretor de la Coprativa de Fascia, Ferruccio Chenetti zootecnich, Sebastian Ghetta produzion bio, Andrea Merz de la Concast – Trentingrana, Rosa Carpano del GAT – Active Hotel Olympic, Dora Tavernaro de la Strèda di Formaes

de la Dolomites. Moderarà l debatit Lucia Gross giornalista de La Usc di Ladins.

Per serèr sù se podarà tor pèrt a la cercia vidèda del formai Dolomiti con Giampaolo Gaiarin

de la Fondazione March.

Da les 14.30, 15.00 e 15.30 se podarà vijitèr la mèlga con n espert. Se se troa tedant a la entrèda de la botèga. La vijita è perveduda per no più che 35 jent a la outa.

L'identità te vedrina

Dai 6 ai 11 de mé i boteghieres de Fascia vegn enviè a fornir sù sia vedrines metan fora n segn de l'identità ladina. L'Union di Ladins met a la leta la bandiera

ladina e la tabela de l'Aisciuda Ladina che se pel ciapèr per nia se oujan te senta de la soziazion a Sèn Jan. Boteghieres, forn sù voscia vedrina!

L'Aisciuda te scolina

Ence duta la scolines de Fascia porta dant sia scomenzadives en onor de l'identità e del lengaz ladina a sia families e ai rapresentanc de la istituzions che à endrezà.

I bec jiarà con Bertol, la mascotte de l'Aisciuda: chi se regolarà, chi ciantarà sia cianzon, chi n fajarà sù un con material reziclà, chi se enventarà sia storia e chi l depenjarà e farà

sù n zeberchie. Claus Soraperra e Manuel Riz ge portarà dant ai bec coche l'è stat enventà e dessegnà Bertol e coche l'è doventà l simbol feruscol e deletegol de l'identità ladina fascèna.

Te chisc dis te la scolines vegn dat fora magnadiva tradizionèla ladina, vegn rejonà ladin e a duc i bec ge vegnarà dat fora l pontapiet del Bertol.



L placat de l'Aisciuda Ladina de chest an.